



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Episcopo Et Archidiac. Zamorensi, & Didaco Priori de Morerola.

urn:nbn:de:hbz:466:1-20006

NEOCASTREN. EPISCOPO.

Epist. 250.
Quod à decessoribus alienata revocare liceat.
* Addendum res, vel facultates, vel possessiones

Significasti nobis per literas tuas quod bonæ memoriæ G. prædecessor tuus, & qui secuti sunt eum usque ad tempora tua, * ad mensam pontificalem pertinentes in tuum & Ecclesiæ detrimentum quibusdam laicis minus rationabiliter contulerunt, concessionem ipsas instrumentis publicis munientes; & ut auctoritate nostra quod ab eis perperam factum est, tibi corrigere liceat, suppliciter postulasti. Nos ergo attendentes quod delictum personæ non debet in damnum Ecclesiæ redundare, fraternitati tuæ per apostolicas literas indulgemus, ut quod à jam dictis prædecessoribus tuis usque ad præsens in præjudicium Neocastren. Ecclesiæ minus legitime alienatum est, ad jus ipsius tibi liceat appellatione remota legitime revocare. Nulli ergo &c. Datum Romæ apud sanctum Petrum Nonis Junij, Pontificatus nostri anno primo.

STRIGONIEN. ARCHIEPISC.

Epist. 251.
Privilegia Ecclesiæ Strigon. confirmantur.

OVia te tanquam præcipuum sacrosanctæ Romanæ Ecclesiæ membrum & venerabilem fratrem diligimus, & totis in Christo visceribus amplexamur, tuis desideriis grato concurrentes assensu, petitiones tuas ea qua decuit affectione recepimus, & earum tenore plenius considerato, quantum cum Deo potuimus, curavimus executioni mandare, & devotionis tuæ fervorem, quem ad Romanam Ecclesiam & nos specialiter habere dignosceris, studiosius commendantes, tam privilegia Ecclesiæ tibi commissæ canonicè à prædecessoribus nostris indulta, quam etiam indulgentias vel alia quælibet regalia scripta, salvis Romanæ Ecclesiæ privilegiis & indulgentiis, auctoritate apostolica illibata præcipimus & inconcussa manere. Nulli ergo &c. Datum &c. II. Non. Junij.

FRATRI IOHANNI
& aliis fratribus domus sancte
Trinitatis Cervisfrigidi.

Epist. 252.
Data iis bona, in pios usus conferenda, auctoritate apostolica confirmantur.

CVM à nobis petitur &c. usque ad verbum assensu, personas vestras, cum omnibus bonis tam ecclesiasticis quam mundanis &c. usque ad verbum suscipimus. Specialiter autem domum

sanctæ Trinitatis Cervisfrigidi, quam carissima in Christo filia M. Comitissa Burgundiæ pro redemptione illorum qui armatura fidei communiti, pro lege Dei se murum defensionis hilariter opposcentes, ab inimicis crucis Christi sæpius detinentur, & barbaricæ captivitatis jugum in fame & siti omnimodisque laboribus pro Christo sustinere lætantur, vobis caritative contulit, locum quoque de Planels, cum Ecclesia ibidem fundata à nobili viro R. de Planels, ad idem opus vobis collata, domum etiam quam nobilis mulier Maria panateria in Parisien. diocesi, videlicet in Burgo Regina, vobis ad hoc idem in perpetuam elemosynam assignavit, cum omnibus ad ea spectantibus, sicut ipsa justè & pacificè possidetis, vobis & successoribus vestris auctoritate apostolica confirmamus, & præsentis scripti pagina communimus. Statuimus etiam ut domus vestræ præsentis atque futuræ, à statu illo in quo eas deliberatione provida ordinastis, videlicet ad redemptionem captivorum, vel ad observantiam vestri ordinis & institutionis, nullius præsumptione temeraria valeant immutari. Nulli ergo &c. Datum &c. XVII. Kalend. Junij &c.

EPISCOPO ET ARCHIDIAC.
Zamorensi, & Didaco Priori
de Morerola.

EX parte Legionen. Ecclesiæ fuit in auditorio nostro propositum quod cum olim inter ipsam & monasterium sancti Facundi super Ecclesiis de Burgo & Cauto quæstio verteretur, Abbas ipsius monasterij lire pendente ad apostolicam sedem accedens, à bonæ memoriæ Celest. PP. prædecessore nostro privilegium impetravit, in quo, veritate tacita, prædictas sibi fecit Ecclesias & multas alias confirmari. Sed privilegio ipsi magna pars fratrum nostrorum nec subscribere, nec consensum suum voluit adhibere. Volentes igitur eidem Ecclesiæ in sua justitia non deesse, discretionem vestræ per apostolica scripta mandamus quatenus tam super privilegio ipso quam super memoratis Ecclesiis & aliis quæstionibus audiat quæ fuerint hinc inde proposita, & appellatione remota usque ad diffinitivæ sententiæ calculum procedentes, gesta omnia redacta in scriptis, & sigillis vestris im-

Epist. 253.
Vt causam Capituli Legionensis contra monasterium sancti Facundi cognoscant.

pressa, ad sedem apostolicam destinetis, statuentes partibus terminum competentem, quo recepturæ sententiam nostro se conspectui repræsentent. Si qua verò partium super principali vel incidenti duxerit appellandum, vos nihilominus, quantum de jure poteritis, servato tamen mandati nostri tenore, in ipsius inquisitione negotij procedatis. Quòd si omnes &c. tu frater Episcopo &c. Datum Romæ &c. II. Non. Junij &c.

ALFONSO AVRLEN.
Episcopo.

Epist. 254.
Statutum aliquod
novum confir-
matur.

QUæ ad ampliandum cultum divini nominis à Prælati Ecclesiarum providè statuuntur, firma debent & inconcussa servari, & ad obtinendum robur perpetuæ firmitatis apostolico præsidio communiri. Significasti siquidem nobis quòd ut in Ecclesia tua solenniùs Domino serviretur, de consilio Capituli tui sex præbendarum proventus provida deliberatione conferre duodecim portionariis statuisti qui debeant in eadem Ecclesia ad supplendum aliorum defectum continuè residere. Eapropter, venerabilis in Christo frater, tuis precibus annuentes, institutionem ipsam, sicut providè facta est & recepta, auctoritate apostolica confirmamus, & præsentis scripti pagina communimus. Nulli ergo &c. Datum Romæ apud sanctum Petrum VIII. Idus Junij &c.

CVPERSANO EPISCOPO
& Archidiacono Oritan.

Epist. 255.
Vt contra Episcopum Muti-
lensem, dilapi-
datorem, & a-
liorum crimi-
num reum in-
quirant, & Ar-
chidiaconum,
quem spoliavit,
restituant.

Dilecto filio Hugone Mutilen. Archidiacono conquerente didicimus quòd cum quondam Mutilen. Episcopus curam rerum Mutilen. Ecclesiæ olim ei Cantori & Thesaurario, præsentis Capitulo, assignasset, venerabilis frater noster Mutilen. Episcopus eum, quia quendam mulam Ecclesiæ cuidam Clerico commodaverat, quæ ei fuit postmodum violenter ablata, ipsum post appellationem ad sedem apostolicam interpositam & per se verberavit, & fecit ab aliis verberari. Qui in granario postmodum jussu præcipitatus ipsius, manibus post terga ligatis, cippo fuit & compedibus ferreis alligatus: ubi, propter poenæ alleviationem, Willielmo nepoti & Simoni genero ejusdem

Episcopi dæceta & eorum summam cum rebus aliis concessit invitus. Cùm autem de tam arcta custodia fuisset, sicut asserit, non humano sed divino potiùs auxilio liberatus, idem Episcopus eum ab officio beneficiique suspendit, & Willielmum nepotem suum in castro Massastro Archidiaconum, & quendam alium in Mutilen. Ecclesia in præjudicium juris ejus Archipresbyterum ordinavit, & eundem Archidiaconum Stephanus filius Alfaranæ, Bajulus civitatis, mobilibus spoliavit, & dominator civitatis immobilia auferens, eidem Archidiacono civitatis aditum interdixit. Proposuit etiam idem Archidiaconus gravia contra Episcopum memoratum, super electione non canonica, dilapidatione Ecclesiæ, & crimine simoniæ, ac quòd Episcopus ipse cujusdam manifesti adulteri & alterius falsarii familiaritate utatur. Verùm quia nobis non constat de prædictis, discretioni vestræ per apostolica scripta mandamus quatenus partibus convocatis audiat quæ fuerint hinc inde proposita, & receptis testibus, & attestationibus publicatis, & examinatis legitime, gesta omnia redacta in scriptis, & sigillorum vestrorum munimine roborata, ad nos dirigere procuretis, statuentes partibus terminum competentem, infra quem, recepturæ sententiam, nostro se conspectui repræsentent. Interim autem Archidiaconum ipsum ad officium & beneficium & dignitatem archidiaconatus restituitis, si id de jure videritis faciendum. Eos autem qui in eum manus injecere temerè violentas, tamdiu excommunicatos denunciatis & mandetis ab omnibus evitari, donec passo injuriam & de ablati omnibus & illatis injuriis satisfecerint competenter, & cum vestrarum testimonio literarum ad sedem apostolicam venerint absolvendi. Dictos præterea Episcopum, Willielmum, & Simonem ad restitutionem librorum & aliarum rerum, prout justum fuerit, monitione præmissa, per censuram ecclesiasticam, appellatione remota, cogatis. Testes autem &c. cogantur. Quòd si ambo &c. tu frater Episcopo &c. Datum Romæ &c.

✠